

四庫全書

集部

欽定四庫全書

靜修集卷十七

元 劉因 撰

五言絕句

十五首

偶成

夢回聞雨聲，忽覺是風聲。
問余何以知，仰見梁間月。

偶書

二首

累累山下塚，渺渺嶺頭雲。
歲晚不歸去，笙鶴應望君。
昨日宋人苗，今日牛山水。
寄語芒芒人，管取牛羊牧。

明珠穴

山從何處裂珠去誰當還餘光爛猶在照我方寸間

盆池

有月漸秋影無風生小波澄心一相對今夜興如何

溪橋步月圖

山中有幽人獨步溪橋月莫問興如何披圖亦清絕

出花

下石綠珠井灸面昭君村坐令宜花地亦復愁移根

史處士挽章

平昔未相識幾回魯寄聲今朝聞謝世便有故人情

春露亭書

老樹含春容寒泉動幽響念彼山中人風露恣清賞

觀石佛有感

明月雲如洗白露春自生石邊有枯木風至亦知鳴

呂洞賓畫像

微茫洞庭曉瀟灑崑崙秋海蟾生碧天相從何處游

絕句

溪童出門望鷗鷺滿空下江水淡無情盡是忘機者

鴈圖

夢迴烟水寒鴻鴈驚不起道人心又閒相忘有如此

商方爵

商爵既云古那堪形更奇不宜燕市酒雅稱野夫詩

箕盤

不作甕商舞休停餅氏歌執籌仍蔽簾辛苦欲如何

七言絕句 七十一首

顏曾 二首

陽光浩蕩斂秋容
陰景深沈暖漸融
萬古顏曾留意象
洪爐春滿聖門風

剪冰成雪舊知冰
搏雪成冰見未曾
到底春風同一貫

要從此地識顏曾
顏愚德
曾魯賢

雜詩 五首

老兔雖難自有春
壺冰澈底照來真
驢鳴畢竟渠皆聽

解識天機得幾人

水華庭草思悠然風月濂溪有正傳二十四年成主簿
已知隨柳過前川

天教觀物作閒人不是偷安故隱淪要識邵家風月興
一般花鳥華山春

寒氣常侵一半春詩家道體說來真不教曉入雄雞口
誰喚南窓打睡人

湯鼎石壇老眼親陰陽誰見屈中伸年來併識顏家樂

十月天教薺麥春

癸酉新居雜詩

九首

一時賓主記從容
萬古風流在洛中
未敢空中望康節
且從實地學溫公

邢恕無端尚可優
朱王邢肯復蘇
讐程門萬古春風在
百草千花得自由

野店襴衫盖世雄
徂徠几杖列兒童
平生自恨無師友
千古空聞圯下風

一語希文鑄大儒太山纔了又橫渠紛紛諸子燈前寢
未管春風朽木蘇

樂事相關禽對語生香不斷樹交春程家若要觀生意
却恐鳶魚畫不真

野色更無山隔斷天光直與水相通不須中夜深思省
卧我高樓霽雨中

牛山昨日恨相忘今日齊苗若未長會待明年新雨足
功夫留着護牛羊

投詩廁裏紛紛口置筆藩間苦苦心千古高風一瓢飲
不從文字得知音

仲舒不草漢三策韓愈欲成唐一經三百年來麟未泣
不知編簡向誰青

道境

道境相看滿面春平生心事數來真南山正在悠然處
未肯回頭錯應人

漫題

乾坤未覺化機停世態難逃醉裏醒共見白雲又蒼狗
豈知螺贏卽螟蛉

漫記

四首

天幙高懸兩部蛙水光山色照黃家忘情未便真忘得
憶竹栽蘆強自誇

我自無行便是藏更將何物要韜光東臯幸有牛溪在
卻向長安說醉鄉

百錢破釜發長嘆一局羸棋為解顏擾擾自無安脚處

幾人打透利名關

透得利名關便是小
歇處見趙顯卿手簡

應物何嘗累我真
禪家怖死強忘身
昨朝一讀雍行錄
卻笑當年墮甌人

感興

七首

江山心境儘風神
弧矢襟期記此身
說與求田田舍叟
遨遊何必故鄉春

優游千古禍成胎
冷雨疏烟撥不開
却喜夷吾成霸業
又思漢武亦英材

天理胸中霽欲流黃浮眉宇酒浮甌生香似見花交樹
引得游蜂舞不休

霜落江湖水太清巖巖山色欲秋爭爭如一覺南窓睡
門外春風草自榮

功名藉口為蒼生唐漢英風未易輕千載興亡舒卷了
區區勲業亦何成

斷簡殘編絕賞音誰從百鍊見真金龍門千古遺歌後
更覺良工獨苦心

按劍無人誅武后
斲棺終恨貸朱梁
一杯爽氣迎秋集
何處雲山是致堂

書事

五首

當年一線魏瓠穿
直到橫流破國年
草滿金陵誰種下
天津橋畔聽啼鵲

卧榻而今又屬誰
江南回首見旌旗
路人遙指降王道
好似周家七歲兒

朱張遺學有絳綸
不是清談誤世人
白首歸來會同館

儒冠爭看宋師臣

風節南朝苦不伸
沂流直要到崑崙
世宗一死千年欠
此是黃河窳上津

唱徹芙蓉花正開
新聲又聽採茶哀
秋風葉落踏歌起
已覺江南席捲來

試筆

眼花不見羲之俗
口快爭言杜甫村
擬欲鑿山藏此筆
高情千古約重論

讀史

中才隨世就功名
恰似焦桐爨下鳴
到底中郎唯兩耳
人間多少不平聲

讀史謾題

眼底權奸漢室空
伯喈文舉亦才雄
王畿廟號闕何事
亦在區區論建中

梁甫吟

功名且就漢庭多
畢竟曹瞞累我何
汝上千年英氣在

有人梁甫正高謨

寫真詩卷

三首

龍祠岳廟盡冠巾
雨露何關土木身
不是二程窮物理
誰從一髮辨天真

彼此相懸一髮邊
聖賢廟貌幾千年
周郊自有園丘在
莫道金人便是天

共說雲雷起畫龍
聲容誰道影堂空
含糊若信俗儒論
已落三家僭禮中

曾點扇頭

二首

晉楚英雄管晏才當時真眼尚誰開
狂生攜著魯兒子獨向舞雩風下來

獨向舞雩風下來坐忘門外欲生苔
歸時過着顏家巷說與城南華正開

燕居圖

伊川門外雪盈尺茂叔窓前草不除
要識唐虞垂拱意春風元在仲尼居

堯民圖

皋夔遺像凜猶存更比淩烟意氣真但使尊前有如此
不慚只作許東隣

許由棄瓢圖

人間洪水正橫波堂上南風入浩歌兩耳區區無著處
一瓢孰與萬幾多

夷皓

萬古人心自有堯直教夷皓怨難消憑誰移去安歸嘆

換作康衢擊壤謠

龜蓮圖

龜約蓮香上翠盤
四靈長向畫中看
題詩記我千年恨
風月無聲洛水寒

畫李渤聯德高蹈圖

五首

方寸無窮皦皦天
豈惟毛髮要歸全
臨終一聽魯元語
愈嘆黔婁有婦賢

天意行藏我自知
區區猿鶴亦何為
室無萊婦君休恨

免使狂歌誚仲尼

江湖魏闕有心期
莫怪先生起太遲
寄謝移書韓博士
山妻元不解啼饑

諸生課罷弄烟霞
紡績乘閒為煮茶
白麻高風有誰繼
草堂貧女晦庵家

萬里江鷗不易馴
百年我愛隱君秦
歸來匹婦休相笑
老眼真能混世塵

幽人圖

二首

無媒路逕草蕭蕭
山鬼脩篁夢轉遙
手撚幽香意何遠
為誰終日面岵堯

澗響無心和
考槃雲容有意近
長安野猿窺破中宵夢
卻恐山靈不易謾

高卧圖

萬里青山卧平地
世間何物是元龍
無人說與劉玄德
君在青山第幾重

華山圖

水墨驚看太華蒼夢中千載果難忘三峰雖乞希夷了
應許劉郎典睡鄉

孫尚書家山水卷

三首

扁舟老樹傍蒼崖好似今秋雪嶺迴試問黃塵山下渡
幾人曾為看山來

諸公久矣笑吾貪是處雲山欲結庵只有皇卿解贊助

畫山須畫靜修龕

謂皇甫
安國

畫圖題品代移文寄謝神州老使君欲乞龍山恐孤絕

南州隆慮且平分

郭氏家山圖

鹿門烟影接隆中
翁媪通家社酒紅
只有山童最神駿
舊曾床下拜龐公

雲山晚景圖

天機濃淡出巖姿
夢境風雲入壯思
畫裏青山照白髮
行藏渾似倚樓時

春雲出谷橫披

筆底天機幾許深
雲容直欲見無心
苦心只許時人會
不為題詩亦未尋

秋山平遠圖

南山千古一悠然
誤落關仝筆意遑
急著新詩欲收領
已從慘澹失天全

郭熙山水卷

品姿秋意淡無弦
烟影天機滅沒邊
更看山翁掩書坐
只應人境兩翛然

李伯時馬

足不能行氣自馳
天機深處幾人知
世間無物能形此
除我南窓兀坐時

祖愚庵家藏畫冊二

二首

敗荷野鴨

畫裏瀟湘自要秋
詩家野鴨謾多愁
試看翠減紅銷處
好稱江清月冷舟

風柳牧牛

遠意昇平畫不勝牛邊烟樹渺層層前頭恐有桃林路
百喚溪童不解磨


題理宗詩卷後

已未天王自出師眼前興廢想當時臨江釃酒男兒事
誰向深宮正賦詩

里社圖 二首

賦薄徭輕復有秋天恩帝力為誰優老盆醉殺村夫子
盡道今年好社頭

亂後疲民氣未蘇
荒烟破屋半榛蕪
平生心事羲皇上
回首相看是畫圖



靜修集卷十七

欽定四庫全書

集部

靜修集卷十八至二十

詳校官中書臣徐志晉

侍讀臣孫球覆勘

覆校官中書臣汪學金

校對官中書臣蔣寬

校對官學正臣吳垣

謄錄監生臣劉廷勳

謄錄監生臣劉天綸

欽定四庫全書

靜修集卷十八

元 劉因 撰

七言絕句

六十一首

新居

萬事休關百病身
書囊藥裹最相親
年來愛與漁樵話
恐有無心失位人

偶書

平生積學連城壁
萬古虛名衆口金
午睡覺來門巷靜

雨晴風細鷓鴣鳴

晝睡

世事悠悠莫謾驚
直消鼻息幾雷鳴
高松似會幽人意
也學鶉鴝枕上聲

睡起

晚醉城南不記回
虛簷高枕藉莓苔
酒醒涼意蕭蕭在
應是前山送雨來

客來

老懶相逢口倦開山城無酒慰徘徊家僮使慣知人意
豫設棋枰待客來

對棋

直釣風流人素琴也應似我對棋心道人本是忘機者
信手拈來意自深

題樹上

不脫蓑衣臘網回芒鞋隨意趣蒼苔忽聞人語還私笑
林外誰呼學士來

名吾山亭

平生心事與山親，不忍稱呼作此君。
亭自屬君山屬我，四時風景要平分。

憶飲山亭

但得酒同張野飲，猶勝事對阮生論。
它年乞我園亭住，便喚西疇下澗村。

書田舍壁

里胥初過期無事，營幙遲來望有年。
鄰舍借醅留客宿，

土床分席枕眠

絕句

今朝客為求文至昨日隣嫌借米移
木枕質錢多舊帖
看囊不必要新詩

山家

孟氏養親惟小園
董生有吏索租錢
留詩自媿非韓杜
聊記林宗識子賢

山行遇雨

無邊暮雨暗山前天意人情豈偶然
衡岳自能哀吏部
嵩高元不識伊川

喜雨書事

四首

拍手兒童笑不休
笑君前日為誰憂
天公自有甘霖在
未管渠侬浪白頭

一笑黃河一度清
自緣無物盡歡情
今朝久旱雨三尺
消得山人酒滿傾

坐占庭蟻戰餘酣
一飽無功益自慚
但見人人厭梁肉

野夫方覺薺苗甘

為驗陰晴省漏星
要知疏密候簷聲
夜來還却當時睡
不脫蓑衣直到明

即事

雲白天青浩不收
雨晴山色欲無秋
淡烟衰草關何事
落日江波空自愁

登樓絕句

倚遍闌干十二樓
卷舒風景入兵籌
南山自古為勦敵

秋色終當讓一頭

山寺早起

松窓一夜遠潮生
斷送幽人睡失明
夢覺不知春已去
半簾紅雨落無聲

萬壽宮館舍

來時殘雪點征衣
落盡庭花尚未歸
夢裡不知身尚病
春衫歸路馬如飛

答問目執其兩端章

不是黃河且勿論只從河水覓通津西至崑崙東至海
從頭一一認來真

次人韻

二首

花落歸根恐未真又從碩果強尋春玄都觀裡桃千樹
誰是前身與後身

桃花結子更生孫千樹玄都作好春若遇禪家說生死
捫根拈與繫頭新

狂生

放曠無端更自神豪誇欺世語誰真如何老阮無情甚
不願兒郎作大人

蠢齋

莫倚蠢愚遂自疏保身須要畏刑書頭邊既有儒冠在
誰為齋名赦得渠

勉齋

萬逕千蹊各自分北轅適越亦徒勤勉齋究竟將何勉
不認途真恐誤君

疎齋

漫浪隨時取自更要從僻

明

到無名疎齋未便常為主

月旦明朝有後評

眼前萬事先天圖人力那容巧有餘看盡四傍文理密
環中空濶卻如初

寒食

執綏猶恐墮危傾感悅危還損靜貞欲看人間家道正
重門深閉過清明

夜坐即席分賦燈花餅聲

眉間正有喜千丈眼底繞消燈一華我自無憂安得喜
不須開向野人家

萬丈潮頭落晚江一餅收拾入秋牕宮商不在人間世
鼻息雷鳴未肯降

紙帳

閒中今古道中身靜裏乾坤夢裡神放下蒲團閒打坐
紙簾和月一壺春

謝處士載月圖

扁舟西子五湖過
謝客西風兩鬢皤
一種清江明月底
憑君試問夜如何

昭君扇頭

武皇重色思傾國
趙氏承恩亦亂宮
自售懸知非靜女
漢家當論畫師功

不忍紛紛醜女顰
百年孤憤漢宮春
一身去國名千古
多少名臣學婦人

僧惠崇柳岾游鷺圖

河堤烟草柳陰勻舒雁羣游意自馴此是吾鄉舊風景
畫中相見亦情親

題孫氏永慕圖

畫其家山
先塋所在

游宦恐忘邱壠念披圖如對白雲孤平生畫卷看多少
最愛孫家永慕圖

陶母剪髮橫披

剪髮英明子可知披圖三嘆淚雙垂阿娘襟量如陶母

爭信癡兒到老癡

跋遺山墨跡

晚生恨不識遺山每誦歌詩必慨然遺墨數篇君惜取
汪家叅校有他年

王君願縱私屬詩卷

共賦人形覆載間忍教牛馬與同欄人情比比王褒約
毀券如君亦自難

朱孝子割股詩卷

抹本戕枝亦可憐
粉身爭忍欲崩天
詩書明日良心在
應對瘡痕一泫然

便律韓文恐太偏
狂童十歲亦堪憐
偶從德色覩鋤耨
重為朱郎賦此篇

陳雄州止善堂詩卷

久被邦君撫養慈
野人無路識風姿
願將明日甘棠詠
用續諸公止善詩

王治中請蠲免回

都南連歲水為灾輸挽區區亦可哀驚見流民行復止
傳聞昨日治中来

賀廉侯舉次兒子

相國當年病且貧乘除天理暗中存青青後樂堂前樹
又見廉泉第二孫

長卿兒子阿延百晬

二首

老年生子吾所願所願常推欲及人但願無灾保家外
一生長作太平民

和子新年亦解狂詩中名姓莫相忘通家會有西山約
合喜磨門共父長

答友人見寄

兩首新詩寄草堂一詩曾許卜隣牆白雲已領歸來約
只恐山靈不解忘

寄毛得義

白沙翠竹北比隣夢想南湖老聘君遙憶郡樓風景好
幾時同看暮山雲

寄楊晉州 二首

曾是吾鄉舊幕官
秋風碧水記紅蓮
而今卻憶當時事
回首驚看二十年

南州選舉數三楊
中統衣冠半在亡
明日朝廷訪耆舊
不應白首尚為郎

郝生知林州

到處雲山是我詩
不愁無物慰相思
只從隆慮烟霞色
領取幽人笑傲姿

送琴客還池州

五首

江左衣冠自昔聞
紫陽遺學竟誰真
抱琴為向山中聽
林下寒栖恐有人

謫仙胸次九芙蓉
又落人間劫火中
浦思山哀天不管
為絃五曲和松風

過手春風不見痕
曲中悲壯宛猶聞
明朝無限空山夜
月白風清覺少君

人物翩翩美少年
不應心事只揮絃
書中名理琴中趣

更有歸鴻目外天

日暮江東有所思未須千里寄吾詩但看西北浮雲盡
是我倚樓閒望時

送新安田尹

扁舟屢訪南溪老驚見田侯拜下風一遇蓋公能北面
愛君心與故人同

朱君挽章

送葬曾求薤露辭一家風樹衆人悲十年不廢當時念

篤孝如君亦我師

李臨城哀挽

仲溫

趙郡經過二十春
臨城名姓舊曾聞
驚看哀誄傷存沒
悵望恒山日暮雲

樂府

十一首

水調歌頭

同諸公會飲王氏飲山亭
索賦長短句做晦翁體

一諾與金重
一笑對河清
風花不遇真賞終
古未全平
前日青春歸去
今日尊前笑語
春意滿西城
華鳥喜相

對賓主眼俱明平生事千古意兩忘情我醉眠卿且去
扶我有門生窓下烟江白鳥窓外浮雲蒼狗未肯便寒
盟從此洛陽社休厭小車行

念奴嬌

憶仲良

中原形勢東南壯夢裏誰城秋色萬水千山收拾就一
片空梁落月烟雨松楸風塵淚眼滴盡青青血平生不
信人間更有離別舊約把臂燕南乘槎天上曾對河山
說前日後期今日近悵望轉添愁絕雙闕紅雲三江白

浪應負肝腸，銹舊游新恨。一生都付長銹。

喜遷鶯

乙亥元日

春風滿面是胸中，春意與春相見。不醉陶然，無人也笑，況是一年清晏。寧兒挽鬚學語，嬰婦舉杯重勸，道維願貧常圓聚。老常康健。二十七年世事，經千變，今是昨非。春思花柳消盡，冰霜殘怨。門外曉寒猶淺，門上垂簾休捲。燈花軟，酒香濃，趁歌聲試輕輕噉。

南鄉子

題外甥郭氏
畱畊堂壁上

方寸足留畊大勝良田萬頃平陰理不隨陵谷變分明
霜落西山滿意青千載董生行雞犬昇平畫不成終日
相看天與我高情身外浮雲自古輕

二

張彥通壽

窓下絡車聲牕外兒童課六經自種墻東新菜美青青
隨分杯盤老幼情千古董生行雞犬昇平畫不成應笑
東家劉孝子無能縱飲狂歌不治生

菩薩蠻

王利夫壽

吾鄉先友今誰健西隣王老時相見每見憶先公音容
在眼中今朝故人子為壽無多事惟願歲長豐年年社
酒同

朝中措

廉公惠正議舉兒子

金張家世費貂蟬七葉侍中冠若就詩家攀例生兒合
喚添官憑誰寄語廉泉父老斗酒相歡今歲孫枝新長
甘棠消息平安

臨江仙

廉侯舉次兒子

四海荊州吾所愛
虎賁誰似中郎子
孫今擬喚甘棠
添官前有例
簪笏看堆床
明日乃公歸
舊隱後園喬木
蒼蒼青衫竹馬
雁成行
當年廬孟子
應有讀書堂

二

送王從事

行色匆匆緣底事
山陽梅信相催
梅花香底有新醅
南州今樂土
得意且銜杯
君見太行憑
寄語雲間蒼壁
崔嵬平生遮眼
厭黃埃
高樓吾有興
無惜送青來

西江月

送張大經

留在平生落落休嗟世事滔滔青雲底柱本來高立向
頽波更好一片花飛春減可堪萬點紅飄江華江月可
憐宵莫賦招魂便了

二 贈趙提學酒

買得雞泉新釀病中無客同斟遣人持送旅寓深呼取
毛翁共飲少箇散花天女維摩憔悴難禁安排走馬杏
花陰咫尺春風似錦

靜修集卷十八

欽定四庫全書

靜脩集卷十九

一拾遺

元劉因撰

郭翁詩

并序

翁名思本相人少為輪扁業亂後流寓保定
年今近九十矣早與其兄相失後聞其居河
南老無所依翁乃三往迎之及至奉事惟謹
與同寢處翁家貧素無僕御其兄臥病翁親
為浣滌廁牕其兄臨終嘗以遺骸歸柩為託

而翁亦極力以成其志郡中諸老人與翁年
相若游相好者數數為予道翁行事如此予
感嘆不已為作是詩

佳木交清陰欣然動人意况聞翁之風能不有生氣此
翁少有兄干戈鄉縣異哀鳴念羈孤相思勞夢寐自誓
畢此生復爾歡聚遂千里三往還竟扶籃輿至夜雨一
方床春風滿天地家無十歲僮百役一身寄效兒浣廁
牖代婦理中饋生忘惻獨憂死免道路棄關河隔故邱

走送徇歸志大義今已全
初心始無愧翁本不識書
所知惟藝事作詩美翁賢
亦以警士類

友善堂詩送文子周使江西

我昔客鎮州東隣友善堂
一別今十年主人髮如霜
百年翰林銘許與聲琅琅
愧昔知君淺喜今窺汪洋
暫會復遠別江山懷豫章
舉目見良朋胸中非故鄉
但憂兵亂餘民氣恐不揚
人生貴樹立事業在此方

李從事北上

在昔為趙客君方椽鎮州前年從事保我為鄉人留今
聞當上計適值將南游區區四五年足跡無少休窮達
雖云異飄泊同羈愁

行家園樂畦

極覽力不任近尋情亦親勤人良可愧生物庸非仁氛
雜沒畦隔洗去如游塵激流不知小因風亦生鱗羊乳
生氣少靈厖湫無聞牛姝頗肥澤老馬或當神薯區才
數本臈粥思及鄰庭前席許地可望濟病身茫茫天宇

間此意難重陳

種芋

借地劖深區西隣計已成雖無范陽種尚愛君子名糞
壤豆箕爛南風綠雲平欲知子有孫當驗葉與莖饑腸
日有望歲晚分杯羹未築學圃亭先著種芋經欲持已
試驗盡令鄉曲行

蜀葵

蜀葵落秋子已能成小叢如何同枝花隱隱纔含紅一

氣有先後萬物誰窮通伊誰嘆遲暮來此尊酒同

重游北溪

分韻得
暉字

蒼黃淡野色草樹含清暉林居隱葱蒨晴嵐散霏微歸
雲有真意鳴禽發天機勝處必深會輕觴豈虛揮山泉
來何從北望空依依

呈保定諸公

燕垂趙際間人物熒珪璋諸侯舊賓客一郡宗賢良士
窮叫知己人渴思義漿諸公且勿嗔賤子伸餘狂駟幼

有大志早游翰墨場八齡書草字觀者如堵牆九齡與
太元十二能文章遨遊墳素圃期登顏孔堂遠攀鮑謝
駕徑入曹劉鄉詩探蘇李髓賦薰班馬香衙官賓屈宋
伯仲齒盧王斯文元李徒我當拜其旁呼我劉昌谷許
我參翺翔眼高四海士兒子空奔忙俗物付脫略壯節
持堅剛前年脫潁士峨峨勢方颺欲求伸汨沒今反墮
渺茫少小嬰憂患痛切摧肝腸零丁嘆孤苦片影吊愴
惶溺身朱墨窟人事如水霜高才日陵替壯志時悲傷

駕駘欺赤驥鳴皋笑鳳凰
妾婦妬逸才浪背譏舌長
紛然生謗議鋒起不可當
不忍六尺軀縮項俄深藏
諸公富高義刮垢摩我光
去留從所適爽氣生西郎

七言古詩

八首

送王之才赴史館編脩

太古熙熙存太質誰為結繩陷膠漆
三墳五典生厲階一派前道千流出
商周灝噩數千年刪定塵編纔半壁
自從盲叟好浮誇天遣阿遷奪其筆
歷代煩文愈是非

鑿碎名山藏不得偉哉君實集成爾後不聞麟再泣
遼金二史無人修略主英臣少顏色策書未削徒紛紛
常恨天孫惜刀尺公歟史癖今史榮姦魂夜哭崔浩直
善惡磊磊軒天地筆頭休放波濤息賤子蕪絕寂寞濱
畊牧河山拾古迹悲愁忍效虞卿窮蒼黃敢召台州謫
中原人物有權衡玉堂誰擅才學識山東麟鳳半青雲
燕南獨占天荒隙公能一奮天下文袖手傍觀甘自適
同仲實南湖賞蓮醉中走筆

湓江湛寒風露涼安得置我濂溪堂香塵縹緲芙蓉裳
百年得此南湖張舉杯人勝境亦勝有蓮以來無此香
蓮香隨酒來詩腸得句驚起幽禽翔幽禽隨人作滯態
意欲和我風雲狂人間一味清到骨兩足暫付吾滄浪
螟蛉螺贏卿且去醉眼太華雲間蒼

明遠堂賞蓮醉賦

畫堂香遠凝清秋宛如坐我南湖舟主人愛客情亦重
謂我無語花應羞荷香繞筆詩自健滿紙已覺清江流

平生老氣回萬牛為君傾倒元龍樓舉杯喚起謝安石
我醉不省蒼生憂

元章論書帖

書家豪猛見世變寥寥鍾鼎今幾塵古人胸次無滯迹
意外蕭散餘天真愛書愛畫即欲死狂絕俗絕無此人
臭穢功名皆一戲渠言夸矣君勿聞

阿寅百晬

南湖風鑒不多可詩中驚見阿寅名朝來抱來聚星亭

神涵秋色啼古聲都山張氏世有賢斷崖近得唐碑銘
乃翁寂寞老窮經阿敬健筆敵中勅循環元間豈終晦
開物有期須一鳴老夫自任河汾教先為虛席待此生

友人送枳朮丸

心胸未識黃昏湯無食何用求檳榔書生但苦湯餅睡
已椒慘慘無鼠腸舊聞易水仙翁術綠荷包飯圓枳朮
南州故人持送我但欠黃雲數千斛笑撫青囊時一鼓
健啖何由酬此腹

記夢

天風吹雲送仙槎
蒼麟道前牽紫霞
鳳凰呈舞月妃和
飄飄來自金母家
金母臨行有奇贈
玉簫瑤管聲清佳
囑我醒時無泄露
恐世知子生喧譁
明朝夢覺莫驚怪
異香冉冉浮窻紗

又

眼中雲物徒紛紜
我一掉頭殊不聞
天風瀟瀟燈半滅
忽爾雲間見雙闕
欲吐不吐三萬言
雄雞已落長庚前

牀前阿魯讀魯論到植其杖而芸田

雜言

二首

早發高黑口號

蒼月瘦黑風酸枯梢老竅號空山東方未動天發黑迷
途客子迴征鞍冰髯壓唇帽簷側耳輪霜醉鼻尖寒中
原年少燕南道功名未了黃塵老黃塵老馬上神州依
舊好

送國醫許潤甫還燕

來保定
舟母喪

燕趙豪傑窟馬遷曾此求交遊即今勁氣壓河朔人物
傑出嶄然雄九州燕南子許子胸盤星斗橫高秋窮則
良醫達良相古人須向今人求萬里黃雲馬上家歸來
淚滿銀貂裘民病未蘇國支朽勿以一身戚而忘天下
憂古來奇士重意氣把臂一語肝膽投君能搜我胸中
磊落之奇才我亦為君寫我之幽懷

五言律詩

二十
九首

旅夜

歌枕寂無寐沈思坐不禁靜中天地我閒裏去來今磊
磊平生事休休今夜心何方有邊戍雲外急清礎

虞帝廟

四顧莽何際威靈儼若臨山川尚溥樸天地自高深鳳
鳥千年嘆簫韶三月音元功久無復徒抱致君心

登保府市閣

十載雞泉隱今朝市閣晴民謠混諸國里號帶軍營瀛
海依依見堯山隱隱橫懷今與思古獨立若為情

憶金坡道院

平昔多游覽茲游不易忘
溝涂春脉脉松石晚蒼蒼
有客愛山谷無家名草堂
金坡從此號聊著永相望

寒夜

肝膽了無寐襟懷誰與同
更長頭可白燭暗火逾紅
硯滴水生癭星流氣吐虹
林鴉先我起鳴噪竟何功

移甘菊

移晚戒前歲植根先此秋
親嘗杖履遍嚴課僕童憂小

藥終年計新羹一飽謀區區嘆莎棘陸子謾多愁

採野苴

糞壤自肥膩靈苗絕世紛炊餘香更美甘出苦難分宜
酪法新得輕身方久聞野人聊自享未敢獻吾君

食菰白

採食陂塘利分甘野老心杯盤收浩渺蘋藻避清深命
婢即能識招隣亦見臨吾鄉希此味咀嚼有吳音

酒令

觴至欲何語令嚴當謹聞茅容唯問稼李白只論文且
喜無多客毋辭過半醺故人知此老舉白解浮君

簞尊

宋秘監
索賦

南國有奇竹天然成酒尊來因交趾使價重秘書門含
蓄中誰似堅貞節尚存盤桓古人意觀象可忘言

鸚鵡

風雨房櫳暗猶疑隴樹昏無愁緣得食有夢想高翻巧
語難自脫深憐未是恩人情多好異渠豈不能言

宋道人八十詩卷

往事枕中記新編柱下言知音有銅狄逸史訪金源春

露霑濡際秋陽想像存初逢疑夢寐垂泪拜桓温

宋貌絕肖

先子

鄉人王母九十

九十青瞳母寒温白髮孫桑田閱滄海冠帔記金源案
上春風橘堦前雪色萱移家就鄰舍種杞易陽村

寄答祖父

先友從遊地雍容几杖尊秋風太古觀春日樂郊園妙
理欲自得高情誰與論別離空六載期待負知言

楊子忠總管福州

燕趙多豪傑楊侯志自奇風流猶世胄開與亦天資尊
俎論交地江山送別時閩中有佳政聊用慰相思

送尹宰

百里衡山縣千年陸宰名隣封今見此鄉校可無評俎
豆欲成趣絃歌漸有聲涑陽吾舊隱聞去亦關情

送成判官

釋菜成鄉約從君此例新
歡遊渾幾日離索又殘春
相愛求詩切臨行枉駕頻
幾年人事絕送子為情親

送成從事

易水河梁夢回頭已十春
相逢驚我老送別向君頻
求贈攀前例將時認故人
故山松菊在歸去未全貧

寄子東太守

一夕西山客十年往事非
黃塵驚我老青眼似君稀
別

浦秋容靜離亭草色微殷勤重寄謝後會不應違

送東海相士

青鏡雲千變紅顏酒一卮忘言三日雅觀化百年期烈
火誰當救神遊亦自竒海山如見問聊舉送君詩

感范女

房望吳中范衣冠相國孫風流猶李白樵爨已陳雲感
事哀龍種慕名重虎賁乾坤厭更迭誰與救紛紛

哭張之才

義許同生死奪君何遽然無人共清夜有泪葬黃泉苦

疾求予禱遺孤託我憐傷心墓頭字旌孝看他年

予題其墓

道為張孝子墓

哀郭勸農

才命不相偶如君良可嗟半生在人下一死更天涯三

歲同君里前年過我家相望已塵迹零落舊烟霞

頤齋張先生挽詩

與先奉直府君同住金太學

耆舊晨星盡公亡益可嗟先人曾共學穉子與通家白

日明心素青山點鬢華封龍餘爽氣誰與酌烟霞

贈答學者

士論清脩品天然孝友資從遊無少補離別有深思貧
說長年在文驚近日奇吾言不足重愛子欲何為

西市藥隱

之子隱於藥四休今不孤藏名那論價得號尚嫌壺知
足隨處樂忘機一事無東隣開小徑茗碗不須呼

獨立

恒嶽精英大直衝
昂畢星初疑元氣白
橫界太虛青欲
與河漢共不隨
霜露零相看一杯酒連夜立中庭

嘉甫從親王鎮懷孟

茲遊真可樂
兔苑更扮榆
孝弟燕南選
文章郝氏徒
早年多急難
晚節足歡娛
寄語賢兒姪
詩書是遠圖

集杜句贈王運同彥材

霄漢瞻佳士
公侯出異人
家聲同令聞
文雅見天倫
元朔巡天步
危樓望北辰
燕王買駿骨
黃閣畫麒麟
妙譽

期元宰蒼生倚大臣蛟龍得雲雨鵬鶚離風塵治國明
公在雄圖歷數屯世儒多汨沒賢俊贊經綸開闢乾坤
正調和鼎鼎新弼諧方一展風俗盡還淳經濟宜公等
泥塗任此身尊榮瞻地絕感激畏天真交態遭輕薄浮
生有屈伸嗟予意輒軻撫迹獨酸辛留滯才難盡蒼茫
興有神形容真潦倒世業豈沉淪倚着如秦贅逢迎念
席珍壯心久零落敗績自逡巡載感賈生慟難甘原憲
貧邵平元入漢王粲不歸秦回首驅流俗生涯脫要津

稻梁求未足
台衮更誰親
碧海真難涉
蒼鷹愁易馴
君能微感激
何處不依仁

靜脩集卷十九

欽定四庫全書

靜脩集卷二十

拾遺

元 劉因 撰

七言律詩

四十
一首

渡白溝

薊門霜落水天愁
匹馬衝寒渡白溝
燕趙山河分上鎮
遼金風物異中州
黃雲古戍孤城晚
落日西風一鴈秋
四海知名半凋落
天涯孤劒獨誰投

遂城道中

鐵城秋色接西垣
遠客還鄉易斷魂
霸業可憐燕太子
戰樓誰弔漢公孫
冷烟衰草千家塚
流水斜陽一點村
慰眼西風猶有物
太行依舊壓中原

鎮州望抱犢山

亂山西去獨崢嶸
合在仙經第幾名
物外高閑真有意
亂來險固亦堪驚
太行穠秀霜洗盡
全趙規模天鑿成
珍重幽人留顧盼
封龍英爽未全平

避暑玉溪山

風露撩人儘力清也應知我到禪扃秋聲滿谷有生氣
山意帶烟成遠形皎月欲升天失色白雲初出樹留青
他年若訪經行處合有先生避暑亭

溪光亭小憩

尋源隨水到溪亭十里綠陰慙鳥聲自惜形骸恒世故
豈知風露已秋清白雲似與山爭秀落日放教川盡平
六月農家獨赤地登臨舒嘯若為情

留題山房

靈風縹緲竹花飛怪石參差樹影齊壺裏有天藏日月
杯中無海飲虹蜺松生太古鶴應識路入白雲山盡低
萬里黃雲一回首微茫烟水意淒迷

水門庵

池烟林影淡無姿物外高寒兩石磯雲水流行寧有跡
乾坤俯仰自相依波涵晴景動猶靜鳥戀幽人去復歸
回首塵緣吾未了靈風且莫故吹衣

井陘淮陰侯廟

君臣尚詐日生疑誰與乾坤息戰輦未論恃功羞伍噲
試看觀變要王齊良能用漢氣無敵蕭可制韓才自低
枉為虛名誤忠節五陵烟樹亦淒迷

登高有感

疎烟晴曉散輕寒秋色滿林霜意閑今古消沉幾白日
乾坤洒落一青山半生心苦頭先老兩姊墳荒淚未還
瞬息西風解十里登高聊為送餘潛

樓上

樓觀參差接大荒五雲分我白雲鄉卧之地太
行小
來自帝傍春夢長灝露明河氣蕭瑟黃塵落日烟蒼茫
清風簾外問何客元鶴飛鳴天一方

春游

巧穩林亭無四隣背山向水得天真風光正及二三月
童子同來六七人十日得閑須小醉一年最好是深春
鳥聲自向花枝說曾見無懷有此民

新秋

俗物何曾擾病懷
憐渠孤憤若為開
人生如此亦安用
野鶴翩然去不回
萬古青天留月在
幾聲白鴈送秋來
西城無限峰巒好
擬對一峰傾一杯

秋夕

西風吹掩讀殘書
慨想平生時自呼
度日悠悠良可惜
軒天磊磊未應無
才名莫要驚人甚
覈論終當與禍俱
長嘯一聲秋意滿
無邊霜葉下庭蕪

夜坐有懷寄故人

幾葉疎桐萬斛秋
四山清露一窻幽
高情千古謝安石
壯志平生馬少游
有錯真成六州鐵
欲還空說大刀頭
悠悠且付天公在
未必蒼生待爾憂

秋望

天從朝雨霽來寬
日到平蕪盡處還
嘆老自非緣白髮
愛閒元不為青山
洛陽懷古真豪聖
李白學仙亦強顏
何處蓮花有仙掌
不妨招我暮雲間

秋日有感

自覺規模日感然初心道德負中年仰觀俯察無多地
往古來今共此天出處不論三代後刪脩直探六經前
南山正在忘言處目送歸鴻手絕絃

癡坐

野人癡坐靜無邊愚弄從渠兒戲然或智或愚能幾里
一鳴一止又千年俗流在眼何妨病細故經心信未賢
究竟誰能離此世孤山絕頂送華顛

盆池

青蛙昨夜雨來鳴斗水那容掉尾鯨白髮驚魚應百我
扁舟捉月記三生荷風拂面秋先覺苔露生波晚更清
我欲江東鑑湖老天河早為洗南兵

虎甲

氣勢江淮一旦空故教金甲虎生風崢嶸鐵騎千夫勇
凜冽寒威百獸雄不信豺貅禦萬竈豈知孤兔動幽叢
聖朝千古征南錄亦有孫君治造功

黑馬酒

仙醪誰誇有太玄漢家捐馬亦空傳香來乳面人如醉
力盡皮囊味始全千尺銀駝開曉宴一杯瑤露洒秋天
山中喚起陶弘景轟飲高歌救勒川

賦孫仲誠席上四杯

仲誠命題
彦通舉韻

隴鳥回頭意若何剗腸欲我鑑紅螺微茫山意詩痕在
灩澦江聲飲興多聖處已分糟與蟹醉來唯見酒成波

千年醒殺江魚腹應恨生身在汨羅

一作注瓦傾銀竟
若何紅珠元稱捲

金螺微茫山意詩痕在灩澦江聲飲興多聖處已分糟
共蟹醉來微見酒成波千年醒殺魚蝦腹且莫東流問

羅汨

右螺

碧筍和露捲晴霞錦浪隨鯨落晚沙風起歌聲來弄葉
酒知人意要浮花胸中壁立三峰玉醉裏神遊太一家

明日清霜看紅翠人生容易鬢成華

一作江鄉雲錦爛
晴霞海浪鯨魚落

晚沙烟影橫橋淡留月露香芳酒淺浮花風流玉井三
峰夢浩蕩蓮舟太一家明日秋霜減紅翠人生休遣鬢
華成

右荷

希夷尊俎永相望混沌鑿開見此觴金橘有天容逸老
青田無地避餘香雲中招隱留仙掌物外尋真得醉鄉
試看我峴間啼鳥人間紅雨幾斜陽

一作希夷尊俎永相望混沌鑿開見

此觴霜橘有天容逸老金橘無地避餘香人間王母留
仙種物外秦人有醉鄉試看累累花下塚莫教紅雨怨

斜陽

右桃

後蜀紀劉先祚進挑核杯云得之華山陳搏邵康節謝人惠希夷尊詩有仙掌峯巖

峭不收希夷去後遂無倚能斟時
事高擡手尊酌人情略撥頭之句

瀟湘千樹暮林平風露詩腸快一傾蜜蕊金絲仍可意

香分綠蟻最關情
洞庭春色元無恙
南國幽姿謾濁清

誰辨酒船千萬斛
棹歌和月捲江聲

一作瀟湘千樹暮雲平風露詩腸快

一傾窰戀金絲仍可意
香尋翠袖亦多情
江陵春色元無恙
楚澤幽蘭恐未清
惟有酒船三萬斛
南飛齊和凱聲

右橙

刪錄以韻即席課諸生東齋諸物七首

遠山筆架痕字

何物能支筆萬鈞
按頭依約遠山痕
燈橫煙影隱猶見

秋入霜毫勢欲吞
掌上三峰看太華
人間一髮是中原
中書未免從高閣
不向林泉怨少恩

折疊簡牌筠字

誰將霜縹漆霜筠
幾葉齊分梵夾勻
眼底有無真亦偽
掌中舒卷屈猶伸
墨雲難染秋天濶
碧玉還思曉露新
他日不須焚諫草
一方何處覓緇磷

梅杖枝字

鐵石心腸冰玉姿
掌中潛得歲寒枝
天教一握藏春密

風覓餘香就手吹雪月冷懷隨步履溪山高興入支頤
玉堂若要扶持用說與東君也不知

竹癭知字

為憐鶴髮久雙垂秀出龍孫第一枝鑿破誰言混沌死
彈來未有歲寒知天材擁腫吾當取時樣裝嚴彼亦宜
風月不妨時角出青霜難傍老頭皮

醉梨寒字

玉簪香字

二首並見遺
詩第四卷

秋蓮空字

瘦影亭亭不自容
淡香杳杳欲誰通
不堪翠減紅銷際
更在江清月冷中
擬欲青房全晚節
豈知白露已秋風
盛衰老眼依然在
莫放扁舟酒易空

西瓜

一片秋風落漢城
人間無復渴塵生
鑿開混沌星辰出
碾碎瓊瑤風露清
胸次冰霜惟我在
口邊糖蜜向誰傾
爛腸莫道遮藏得
黑子紅心到底明

又

一團天露暗藏春
多少人間渴死人
面上風光儘冰雪
胸中文彩爛星辰
弄丸我是希夷老
鑿竅誰窺混沌真
沃沃君心甘剖腹
乾坤一闢要清新

貧士

貧士出門多掣肘
聞君幾次謾徘徊
不思學館三年舊
肯為山翁百里來
久倚通家略賓主
新知不飲罷尊罍
殷勤莫厭通宵話
聽說天明即欲迴

故人見訪山中

客子畏人常簡出病來庭戶益荒蕪多時略闕通書問
遠路遙慙送藥須掃地預占燈燼喜敲門遙認草亭孤
故人知我無供給故着看山慰野夫

次韻答河間趙君玉見寄

出門紛擾互相尋常使幽人懶病深前月借書來水北
去年採藥到城陰黃精已倩徐生劚蒼朮新教石老尋
只有烟霞肯賒借無人曾送買山金

憶郝伯常

一檄期分兩國憂長纓不到越王頭
玉虹醉吸金陵月
玄鶴孤遊赤壁秋
漠北蘇卿重回首
天南王粲幾登樓
飛書寄與平南將
早放樓船下益州

涑陽李丈九十壽

九十餘年何限事
向人惟指鬢毛霜
偶因飲酒驚遲醉
不信看書託健忘
還拜嗔扶緣敬客
近遊多步為居鄉
自慚犢子顛狂在
世故艱難未備嘗

壽田處士


慷慨燕南烈丈夫半城和氣溢閭閻仕途盡看鼠為虎
若輩却教龍作魚勤苦十年經子史風流千古畫詩書
交遊剩有名公在未許丹青作敝廬

何太夫人生日

夜夜東隣有香火高門自得百年心蟠桃結實世誰見
隆棟駭人根自深經卷病餘猶早起絲車老去亦親臨
久知吾友閒居意惟願慈顏事不侵

書懷

出門已坐十年遲擇地寧容一物棲
敝簾萬金空自許青雲平地欲誰梯
長庚只合陪殘月衆楚安能立一齊
醉裏商歌動寥廓飛鴻淡淡夕陽低



靜脩集卷二十

欽定四庫全書

集部

靜修集卷二十一至五

詳校官中書臣徐志晉

侍讀臣孫球覆勘

覆校官中書臣汪學金

校對官學正臣吳垣

膳錄監生臣劉天綸

欽定四庫全書

靜脩集卷二十一

拾遺

元劉因撰

七言絕句

五十三首

偶讀謾記二首

恍惚天花散亂風
向前一蹴是虛空
麒麟正要黃金鎖
收拾簞瓢博約中

真樂攻心不奈何
南華風景偶經過
憐君日暮不歸去
直到倚門猶自歌

偶書

車輪有角世無用馬足若方人可尋萬沼千池隨分在
只除明月解同心

天命

天命無私義理公此身承奉有餘恭人心可信難盡合
親令何由敢勇從

雜詩

一語喚醒瑞巖老千年不昧草庵歌閑人為向忙人說

佛法原來本不多

理西齋成

朔風裂地雪漫空
辦向西齋作蟄虫
有客

闕

語

高談方對紫陽翁

早起

饑鼠號多似訴愁
破囊空慣已無羞
閒來點檢幽居事
鷓鴣聲中又一秋

宿山村

石邊流水自縈紆樹杪閒雲恣卷舒長怪西山無爽氣
只因少我一茆廬

宿洪崖觀

雲山不受壯心降無限西風撼客窻應是夜深知月出
却教風雨入清江

大覺寺作

西山詩社久知聞鞍馬曾經亦可人須信此邦文教在
能招錫杖近冠巾

中山道中

不許花開一日先征鞍過處及芳妍只應春暖山翁出
野店溪桃悵望邊

大暑絕句

青山只恐還煉石白日何曾赦覆盆未挽銀河下塵世
先攜赤縣上崑崙

雪嶺遇雨

天為西遊餉我晴野花啼鳥效平生今朝雪嶺初逢雨

應是郎山帶帽迎

土人謗云郎山帶帽十日無道

北窗看雪

背山樓起人呼俗踏雪詩成奴罵狂不俗不狂高枕上
爛銀堆裏數峯蒼

賀正

秋禾夏麥總收成徭役稀疎賦稅輕北疇南庄俱有酒
倒騎牛背遶村行

人日

紛紛世事倒狂瀾鄉學如何又起端六七頑童舞雩下
不知何物是探官

春夜

千紅百紫一般香霧閣雲窻日影長一刻千金買春夜
幽人應也笑君狂

春夜不寐

衆人昏睡我獨坐細看乾坤靜裏春儻使一時俱閉目
知更數鼓是何人

故園寒食二絕

家家有酒老人醉
拜掃歸來壯士耕
縞袂荆簪門巷寂
太平風物故鄉情

一坏新土寄餘哀
故老相邀信步來
行到水西村盡處
桃花無數未全開

中秋無月

鎮日清明此夜陰
如何天意異人心
一聲長笛浮雲盡
快意金杯莫淺斟

霜落

霜落清江一夜秋
覺來明月滿江樓
酒醒人散夜將半
花上烏啼空自愁

山泉

寒溜泠泠爾許清
米狂誤拜石為兄
拔山卷地今誰手
夜夜南窻聽此聲

鼓城龍湫

池龍聞說卧南州
一禱曾分一郡憂
四海蒼生望霖雨

千年誰更傳巖求

煮茶

細聲蚯蚓發銀瓶已覺春雷齒頰生
舉似玉川應有語無弦琴亦是沽名

聞角

人間無物比悠揚誰道一聲隨夜長
餘哀到曉無尋處吹作南湖十里霜

見梅

朔漠梅花到眼中一枝無限是春風
江湖烟雨三千里誰識乾坤造化工

落花

光景花中自一天精神楚楚照芳筵
朝開幕落君休笑還似人間幾百年

啼鳥

幾日春陰幾日晴喚來山鳥話平生
杜鵑解道淵明語只少鷓鴣相和鳴

次人望雨韻

五月良田種不成
蓬蒿無雨亦青青
袖中准有天瓢在
自是今年夢易醒

豆粥

雪瓮冰釐滿
飭黃砂
瓶豆粥
透隣香
此中真味無人識
熬煞羊羔乳酪漿

戲題李渤聯德高蹈圖後

黑色黃頭渠醜女
綸巾羽扇我周郎
已辭魯肅三千里

莫望成都八百桑

鹿門安敢笑隆中耕耨傳來兩地窮
愛殺阿山頗神駿
看教他日拜龐公

牙牙女巽似偏剛教女如羊尚恐狼
若使此剛能有用
文姬却不辱中郎

莫道梨蒸法太偏孔門三法見家傳
燈前一聽阿聲語
愈覺黔婁有婦賢

虞庠吹罷補麻衣習取禁寒抗老饑
幸自伯鸞無識者

對人不必案齊眉

北牕高卧辭周粟
婁氏能貧傳亦誇
畫裏不推陶靖節
恐因白壁有微瑕

求人諛鬼果何為
翻憶謀親入仕時
寄謝韓公莫相挽
山妻元不解啼饑

倫理天生有自然
莫言家累換清閒
何人會我圖中意
說似陽城與魯山

文藁無勞爾謾焚
但將勤孝立吾門
君看珠翠紅油壁

爭信阿良日乞墻

高詠清江月近人一家燈火夜相親
多齋自任傍人笑已把靈臺付鬼神

渠心當與畫圖期莫問圖中我似誰
天意與人論出處我家行止不關伊

秋烟疊嶂圖

不傳者死不亡存滅沒天機尚有痕
曾向烟霏見真態依然猶是畫家魂

畫猿

萬古西山只月明
畫中依約曉猿鳴
幽人未去深湏聽
一出世間無此聲

梅雀扇頭

月影波光淡有春
秋風草草最愁人
憑君欲寄調羹信
恐被枝頭凍雀嗔

題崔氏雪竹海棠二軒

崔氏溪亭竹樹新
分題為我報詩人
而今別有春風在

玉立諸孫鶴髮親

邯鄲歌枕圖

不見當年夢虎公無端幻術眩愚聾區區正有仙凡異
未便壺中勝枕中

田孝子詩卷二

首

比屋春風夢寐前門閭旌孝見今年山林未覺渾無望
試手田家第一篇

佛法天倫亦泛然雲溪獨愛此兒賢詩成未盡南陔興

不是田家第二篇

雨中問雲溪不在

燈火幽窗擬對談
十年不到二龍潭
白雲吹作山前雨
應報高僧不在庵

贈狂道士

得意雲山是處過
逢人對酒即高歌
世人休笑狂夫惡
却恐狂夫笑汝多

靜脩集卷二十一

欽定四庫全書

靜脩集卷二十二

拾遺四

元 劉因 撰

雜著

希聖解

少作

歲丁卯

闕

是月既望秋容新沐明河皎潔天高氣清萬

動俱息於是易川劉子乃起坐中庭有酒一尊飲之無
味有琴一張絃之無聲有書一編周子所傳是謂易通
微妙難詮仰而求之高入青天即而探之深入黃泉余

乃取而讀之星月之下至士希賢賢希聖聖希天余不
覺而嘆曰迂哉言蕩蕩乎浩浩乎天高明神睿孰可希
焉欺我後人迂哉此言于是乎吟清風弄明月扣大塊
飲太和誦太古滄浪之詞仰天而噓喟而歌曰湛爾太
虛兮性命之所居兮皓爾太素兮元氣之所寓兮羲軒
遼兮吾誰歸兮孔昊邈兮吾將疇依兮諷詠不已坐而
假寐良久而起忽見中庭勃勃然有佳氣如聞足音拾
机而視之三老丈也其一人襟懷洒落如光風霽月其

一人有風月情懷江湖性氣其一人有淳古君子之風
三人同行謹迎揖延之上座乃再拜下風進侍于前請
其姓字與其所安止一曰吾稟太極之真二五之精而
生位太極而君天下今老矣無所成退居浯溪拙翁者
也一曰吾借太極之面假太極之形先天而生太初氏
吾母皇極君吾兄欲名之而無名閒居西洛無名公者
也一曰天地之帥吾其性天地之塞吾其體乾吾父坤
吾母吾其子焉藐然中處寓居西土誠明中子者也余

聞而疑之神耶人耶出此言耶且喜且懼且驚且怖乃上手而言曰因也庸俗鄙陋後學晚生未嘗接續紳先生之談論覩大人君子之儀形庭無人迹門無車聲窮窻屏息終日冥冥者蓋有年矣吾三先生之言如是高大何不遊乎神明之域與天為友與造物為徒胡為乎來哉無名公曰子向者招我以太虛之歌引我以滄浪之詞吾不子拒今予赴之子何忘之母乃昧乎天理蔽于人欲耶誠明中子曰子吾同胞之弟吾不忍子英才

而墮子不肖之地吾欲子育而成之子何棄我而忘之耶拙翁先生沉默不言久之乃曰士希賢賢希聖聖希天小子疑吾言乎吾應之曰聖可希乎曰可有要乎曰有請聞焉曰一為要一者何曰無欲孰無欲曰天下之人皆可無欲然則天下之人皆可為聖人然若是則弟子之惑滋甚而不可不解矣先生曰子坐吾與爾言子其聞之天地之間理一而已爰執厥中散為萬事終焉而合復為一理天地人也人天地也聖賢我也我聖賢

也人之所鍾乃全而通物之所得乃偏而塞偏而塞者固不可移全而通者苟能通之何所不至矣聖希乎天至則天不至則大聖賢希乎聖過則天不至則大賢士希乎賢過則聖至則賢不至則猶不失乎令名此聖之所以為聖賢之所以為賢也子受天地之中稟健順五常之氣子之性聖之質子之學聖之功子猶聖也聖猶子也子其自攻而反以我為迂子迂乎先生迂乎苟子脩而靜之勉而安之踐其形盡其性由思入睿自明而

誠子希聖乎聖希子乎子其自棄而反以我為欺子欺先生乎先生欺子乎予於是叩首而謝曰因也昧道慚學空侗顓蒙坐井觀天戴盆仰日捫舌之罪豈敢避之然而辱令教命剔開茅塞洞見天君因雖不敏鑽仰之勞豈敢負先生之知乎無明公誠明中子拊吾背曰吾子勉之他日聞天地間有一清才者必子也夫余辭而不敢當三先生不久留余亦驚悟醒然視之不見其處

弔荆軻文

歲丙寅十月步自鎮州歷保定將歸北雄息肩于易水之上草枯水落寒風颯起登高四顧慷慨懷古人莫測也風蕭蕭兮易水寒此非高漸離之歌乎荆軻與太子澠泣共訣刎血相親就征車而不顧望行塵之時起非此地乎方其把臂成交豪飲燕市烈氣動天白虹貫日亦一時之奇人也至若怒秦王滅國奇謀不成飲恨而死獨非天意乎嗚呼軻乎吾想夫子之憤惋千載不敢遊魂於此矣古稱燕趙多感慨悲歌之士余不忍負此

言也故投文以弔焉其辭曰

稷文祚絕兮天驕強嬴六王猖狂兮係首咸京席卷天下兮勢若縛嬰英雄膽落而求死兮膏鏹鋸之餘腥脫身于商網兮寄命儒坑嗚呼吾子將何為哉此時何以不匿影而逃形慙一時之泰養兮遺千古之盜名逞匹夫之暴勇兮激萬乘之雄兵挾尺八之匕首兮排九鼎之威靈死而傷勇兮雖死何成嗚呼吾子其愚也相彼白帝之嗣兮豈燕秦之鬼囚其阿房未灰兮驪山未秋

走鹿未罷兮素羅未游子亦何人兮敢與天仇嗚呼太
子兮豈無良謀招賢養士兮信義是求胡為嗾獨獠搏
於菟兮不顧吞噬之憂召公之廟不祀兮將誰之尤損
燕士之奇節兮吾為子羞感霸業之遂墟兮悼昭王之
不留仰蒼天之茫茫兮寫我心之悠悠

苦寒賦

嚴氣積玄律窮北斗知春迴指于東惟功成而不去孰
項冥之可容乃鬱彼孽暴激彼威鋒凝愁雲而蔽日怒

寒風而攪空奪陽春之生氣使天地間然寂然如未判
之鴻濛于時燭龍絕光熒惑失次陽烏斷足火鳥縮翅
畢方高飛而遠翔癡牛毛寒而縮蝟炎帝為之收威祝
融為之屏氣羲和倚日以潛身盤古開天而失視天吳
死于朝陽之谷倏忽滅于海南之地若乃焦溪涸熱海
澄沸潭止溫泉水火井凍陽谷凝炎洲地冽裸壤毛繒
熒臺烟滅瘴水生凌而我生于此時奚凜冽之可勝或
有從軍永訣去國長違霜鋒寶劒鐵襯單衣積雪沒脛

悲風激懷夜渡劍河曉上輪臺陰山雪漫瀚海水厚當
此苦寒十死者九又若寒門久客貧閭故居不爨不燭
無衣無襦鼻酸氣失墮指冽膚火如紅金薪如挂枝兒
號妻哭痛盡傷悲抱膝而苦竟死何裨噫嘻嗚呼天歟
地歟神歟彼頑冥之不去我生死其何辜嗚呼噫嘻益嘗
聞之無寒不溫無貞不元時之革化由是而門噓炎吹冷
元氣所存貞極不元寒極不溫乖序錯命罪半東君於
是易川牛馬走地上蟣蟲臣再拜東方發狂語唇凍舌

澁難具陳告我東君胡甚不仁嗟生類而欲盡君奚為
而不春匪我語汝其孰汝親匪君顧我孰活我人我藉
汝力汝假我神天地之和氣黜項冥挽于玄根汲東海
之泥以接地軸鍊泰山之石以補天輪以廣廈萬間庇
吾民之凍骨以布裘千丈弔四海之冰魂使颼颼赤子
鼓舞於春風熙熙然樂其天真胡為弛網維而退避獨
廉讓而謙尊我徒問汝汝且不言於是乎乃歸堊其戶
而葺其楹襲其被而重其衣不尤乎神不怨乎天束手

容足以順乎時之自然

讀藥書謬記二條

人秉是氣以為五臟百骸之身者形實相孚而氣亦流通其色聲氣味之接乎人之口鼻耳目者雖若泯然然其在我而同其類者固已胥焉而相合異其類者固已拂然而相戾雖其人之身亦不得而相知也如飲藥者以枯木腐骨蕩為糝粉相錯合以飲之而亦各隨其氣類而之焉蓋其源一也故先儒謂木味酸木根立地中

似骨故骨以酸養之金味辛金之纏合異物似筋故筋以辛養之鹹水也似脉苦火也似氣甘土也似肉其形固已與類矣而其氣安得不與之流通也推而言之其吉凶之於善惡亦類也

天生此一人而一事固能辨也蓋亦足乎已而無待於外也嶺南多毒而有金蛇白藥以治毒湖南多氣而有薑橘茱萸以治氣魚鱉螺蜆治濕氣而生於水麝香羚羊治石毒而生於山蓋不能有以勝彼之氣則不

能生於其氣之中而物之與是氣俱生者夫固必使有
用於是氣也猶朱子謂天將降亂必生弭亂之人以持
其後以此觀之世固無無用之人世固無不可處之世
也

書示瘍醫

周禮瘍醫凡療瘍以五毒攻之以五氣養之以五藥療
之以五味節之五毒疑即醫師所聚毒藥凡五藥之有
毒者非謂一方五藥而可以盡攻諸瘍也攻與療所以

去其疾也養與節所以扶其本也蓋攻則必養之療則必節之攻視療加急養視節加密理勢然也鄭氏釋五毒以黃堊置石膽丹砂雄黃礬石慈石其中燒之三日三夜其烟上著以鷄羽取之以祝創惡肉破骨則盡出宋楊文公見楊岵驗之果如鄭所云此蓋古方五毒藥之一爾若即以是為五毒則不惟聖人之言不如是之狹而執兼與下文五氣五藥五味之言亦不類矣予又恐以楊之偶中而致人之不中也賈氏疏又以五藥為

五毒則鄭既失經之意而賈又失鄭之意也東坡嘗論學儒不但費紙而正俚語之非唐虞論陶隱居注本草與易之說非知言者蓋儒術之大無對非可與醫並言者也然衆技校之則李明之嘗言蘇沈良方猶唐宋類詩蓋言不能詩者之集詩猶不知方者之集方也一詩之不善誠不過費紙而已一方之不善則其禍有不可勝言者矣友人為醫者求余書其醫瘍也故云

武遂楊翁遺事

翁與予外家通譜牒一世矣昭穆則舅父也八十歲餘
每一過余輒自喜數日而謂有所得也好聞邵氏惡盈
語每告之一二必手錄而藏之嘗謂余曰予視世俗惟
余與山西一石丈者其所為頗當吾子意宜吾子之不
見合於人也畧能道余家數世事每援之以為其朋友
子孫之戒臨終遺其子孫者無他語惟及余戒其諸孫
令從余學而已翁舊嘗與余言昔自西山來武遂涉百
里途一日意甚速訪捷徑於人視所嘗往來當早至中

途遇人奪騎補驛傳乃遠避之乃反迂於所常往來者
爾後思之事莫不然遂不敢求捷又云某人者擁高官
以南余謂其人不免後果如予言蓋治行時余見謀利
之具以知之又云昔年二十餘遇保州抄騎身已十餘
創即伏而死矣其一人復抽刀由背及腹刺至地而去
是時豈意復生於天地之間六十年餘也以此知生死
非人所能為也又云保州屠城惟匠者免于冒入匠中
如余者亦甚衆或欲精擇事能否其一人默語之曰能

挾鋸即匠也拔人于生擠人于死惟所擇事遂已而凡冒
入匠中者皆賴以生當時恨不知其人之姓名若此等語
每語次必一二及之余亦樂聞而不厭其言之屢也性
喜飲醉即微笑好談佛書亦頗能知其微處嗚呼親舊
日益盡予日益孤感念知己不覺涕零遂書此示其子
孫使知翁之言行如是其令不忘余家之好云翁字吉
甫忘其名至元十六年正月十六日書於吟風亭

叙節婦賈韓

韓氏中山治中賈公之子增順妻也其先真定獲鹿人父某金末嘗代上黨張公為潞州帥後歸國移鎮彰德西道會有告其與金恒山武公通問訊者遂繫獄行唐當天下草昧非強宗豪族不能自保其室家况當衰謝罪累之餘其強凌豪奪孰復能禦之者時韓氏年已十五姿色復過人獨能以禮適名族其風節已可想見矣年廿七增順死賈之族黨有欲嫁之者韓氏以死拒之其兄知沁州事某憐其寡欲迎歸之韓氏恐其將嫁

已也凡五往復終不許及年四十則曰吾老矣吾兄必
不强我也方一往焉韓氏出衣纓復移天于大家其生
長見聞宜不知勤儉勞苦為何物也及增順死家無以
為生童稚嗷嗷待哺於前韓氏即斥去脂澤其服飾雖
山野農家之所不堪者韓氏處之若素也復慨然以勤
力自任每夕以麻二束自課剝而績之盡焉而后寢其
事舅姑接夫子御妾媵待親戚則又鄉閭以為模範者
其婿郭賡屢為余言之始為叙其大畧庶有如安定胡

翼之者聞將著之賢惠錄云

靜脩集卷二十二

欽定四庫全書

靜脩集卷二十三

五拾遺

元 劉因 撰

書

答田尚書書

某再拜復禮意懇到至於再三雖不敢當亦所不敢拒者然勢有不能者三今不免一一焉近有人自鄉中來水幾嚙先墓尚賴相去甚近時得展省而謀所以遷避之方必三歲而後可庶幾焉一也家堂垂老有所生女

子在趙州亦欲時一相見若遠去則往復極不易矣二也外舅郭判官平生受知最重今在平定卧疾十月間已一往省視臨別垂泣云比死幸得一相見近其子書來云變腫而利醫者云利不利於是證也拙婦聞之殆難為懷欲遂俱往視之則山路崎嶇往復千里而勢有不能殆不免某復作一行也三也有此三者而遂舍之將以教人而先失已雖公亦所不與也可往則一來即往誠不敢虛偽以要人之再三公若不亮察雖百往復亦

止此而已矣某再拜

答何尚書

某再拜復辱疏禮意甚厚實非所敢當也然易之風土
素所慕愛而公之才器則又所願交而未得者也某平
生常苦無書讀每思欲館於藏書之家而肆其檢閱而
今之藏書復孰有如公之多者是三者益十年之所欲
求而不得者今一朝不求而併得之且公出貴家而能
不忘子孫教養之計求之古人亦不多見而某又何暇

辭但事緒卒不能絕六七月之交當再識之某再拜

與王經略

八月廿八日劉某再拜以平生知己有五年之別且還
自數千里外款段下澤奉候起居角巾私第從容觴詠
為數日留以道前日西山連榻南州並轡之好實初心
也故自四月初始聞有歸意訪問迄今無虛月及至則
腹痛連綿不止而不能徑往南望依依徒增悵悵仲實
來仍聞執事脚氣作不知近日復何如謹專人奉問續

當親往時際秋嚴維順時以道自愛不宜某再拜經畧
恩公執事

答張推官

某頓首啟自僕與仲實交嘗切聞家世昆季之美而執
事恬退之節樂易之風雖未之識固已若親承其教五
月間彥通來聞秩滿家居而僕方私計以事至府則庶
得一見焉及仲實至則紙墨等物遽蒙先施之辱矣且
許以北行則取道於此而將枉駕焉感慰不自勝然思

其所以得此豈仲實諸人嘗以不肖欺執事也比當面
叙姑此馳謝八月廿八日某再拜推官先輩執事

答王判官

某頓首復總判執事向居保府切聞才名風節之餘向
慕而願交之者有日矣然公宦游南北而僕復閉門癡
坐蹤跡蹉跎是以十年之間僅望見風采一二於稠人
之中竟未嘗接杯酒殷勤之歡以道其相與之意及來
山中交道日狹故人日疎凡鄉曲之賢平昔之願交而

未得者日往來於心其相與之意故在忽八月九日領
四月間見寄詩其賦叙平實而興寄高遠辭旨精嚴而
風格古雅其平日磊磊自負與夫期待之辱又槩見於
言意之表讀之不覺驚喜向之願交而相與者自此敢
少進於前矣特恨浮沈久而得之晚和答難而報謝遲
故謹專人先此馳復比良晤秋嚴惟順時以道自愛不
宣八月廿七日某再拜復

答郭勸農

某頓首再拜復書勸農仲淵先生執事辱惠書知勇退之節好士之風不勝嘆服所喻舉可為縣學師者一人見保府及旁郡諸友人年及四五十以上者皆已經擢用其在城一二生徒稍通經者亦以事奪不能去惟李某字某者見在親安縣三臺村居其事行頗可為小學師其累稍輕或可暫去鄉邑然逼於嚴命不敢不勉思之欲求如許端甫者實不可多得也蓋如斯人每每已在仕路不然者或老病不任教讀也僕平昔一二生徒

精通文義者亦各以事纏綿不能遠去為執事計不若
懇留許君之為得也恒之習之廼謹此奉報不能既二
月十一日

如深澤李德常南宮康和之皆可但不知其
人肯應之否

答醫者羅謙父

八月二日因頓首再拜復太醫先生侍下人來領書及
見賜諸醫書前後受賜稠疊矣僕自六月七日中山會

葬妻父七月五日廻目疾暴發至今昏花所謂醫經辨
惑纔檢校二三簡而已昨日定興奔舅氏喪廻而知專
人來且以繕寫脾胃論見命則愈增稽緩之媿也然目
疾纔愈尚不敢久視且一二日間欲於門側建一草亭
又不免監督之役恐久曠日期而虛來人之傭直也今
日早飯竟故遣歸其二書約兩月可畢至期使之來取
可也仲實近出來即送書去比良晤惟以任重自愛不
宣克溫無異此駟再拜太醫先生侍下

請趙教授就師席

總管府廉孚等謹致書於教授安之先生足下近聞病體就平學者莫不相慶比講堂落成有府學生尚克溫等脩館舍備束脩以請伏望早就師席以副國家崇學育才之意正月初八日孚等再拜

靜脩集卷二十三

欽定四庫全書

靜脩集卷二十四

六拾遺

元 劉因 撰

記序哀詞贊疏題跋

宣化堂記

大哉化也源乎天散為萬物而成乎聖人自天而言之
理具乎乾元之始曰造化宣而通之物付之物人付之
人成象成形而各正性命化而變也陰陽五行運行乎
天地之間綿綿屬屬自然氤氲而不容已所以宣其化

而無窮也天化宣矣而人物生焉人物生矣而人化存焉大而父子君臣夫婦長幼朋友之道小而灑掃應對進退之節至于鳶飛魚躍莫非天化之存乎人者也天能物與之化而不能使之不違其化所以明人倫察物理作禮樂制刑政以修其道以明其德人欲化而天理血氣化而性情呻吟化而謳歌暴天化而仁壽洋洋乎而育萬物而放乎四海盤亘天地貫徹古今而莫之違者此聖人宣天地之化以立人之化而使天下後世宣之

也於是時君宣聖人之化大臣宣時君之化列侯守令
又宣大臣之化至於一家宣一長之化一身宣一心之
化一事宣一理之化一物宣一性之化化而宣宣而復
化宣而不已至於不宣化而不已至于無所化故人伸
天化之上天隱人化之中合人物於我合我於天地融
溢通暢交欣鼓舞無所閼隔無所壅蔽人化宣而天化
成矣自世教衰主德不宣恩澤不流而列侯守令又不
能承流而宣化所以陰陽錯繆氛氣充塞而天化窒群

生寡遂黎民未濟而人化息噫天地之化會于人心聖人之化布于方策顧人之宣之者何如耳順天治中周侯孟戡故都運公之長子也學業淹備才術通濟而深識治體昔郡牧劉公病且卒而繼者未至侯以獨員主治有聲嘗於時豐政暇之際新其府之公堂謂是堂者一道聽政之所也上之化由是而宣乃大書其扁曰宣化益亦有意于宣其上之化也且請予記之以為執事者律予申之曰堂以是名人登斯堂思所以下教令思所

以變風俗思所以息獄訟上恐負朝廷興化之意下恐負吾民望化之心如是則雖無斯名豈無斯名堂以是名人登斯堂苟俸祿于此待日月于此行賄賂於此教化不行則歸之上風化不美則歸之下如是則雖有斯名安用斯名嗚呼堂既以是名矣登斯堂者無負我侯无愧斯名至元庚午十二月朔易川劉因謹記

歸雲庵記

易有鄉曰凌雲鄉有道庵曰歸雲鄉民劉用之所作也

用家有田千餘畝水碓二區白金二千兩性薄於自奉而喜施予乃並其居築老子祠祠側為環堵十餘客有學老氏之靜者延而居之凡衣食皆給焉使得一意於學而無事相往來如是者二十年其田財費以盡而用亡矣客亦散矣今但有奉祠者數人而已嗚呼用亦勤矣哉蓋聞燕山竇氏之風而興起者惜其智力止及於此而已也昔予遊西山過其鄉而徘徊者久焉見其山水雄勝雲烟奇麗慨想一時賓主之樂不覺有飄然遺

世泠然長往之志也至元丙戌用之女夫鄧淵拜子請
紀石以旌其事予問他所行狀曰嘗收癰老十餘人養
之家終身焉又通瘍醫以藥授病者不責償問用時環
堵客曰往往以道術知名亦有被徵車賜真人及師號
者門今奉祠闕大人時客崔徵士之徒也問築祠始
末曰今五十年矣問祠所里名曰沈也余於是念疇昔
之經行傷有志之不就取老氏之旨為歸雲之章授今
奉祠者伴歌之以為步虛之變焉惟靈居兮大無隣旋

一氣兮凝雲忽乘之兮下覽思明示兮德之門相彼髦
士兮尚不稱老况軋之尊兮有嚴其昊孰守虛柔兮恒
處予道眷茲人兮與俱命白雲兮前驅渺何方兮故域
雲遙遙兮踟躕是年三月望日容城劉某記

田景延寫真詩序

清苑田景延善寫真不惟極其形似併舉夫東坡所謂
意思朱文公所謂風神氣韻之天者而得之夫畫形似
可以力求而意思與天者必至於形似之極而後可以

心會焉非形似之外又有所謂意思與天者也亦下學而上達也予嘗題一畫卷云烟影天機滅沒邊誰從毫末出清妍畫家也有清談弊到處南華一嗒然此又可為學景延不至者之戒也至元十二年三月望日容城劉某書

玉田楊先生哀辭

并序

余平生所與往還通問訊者皆有日錄而以時攷之庶其有自警者焉昔者有自京師至者曰玉田楊先生嘗

問子動靜於我又曰嘗問子言貌於我或又曰先生謂予過此必識子是以來若是者無虛歲至有素疾予如仇讐言而擠毀百至一及先生之門則必幡然親愛予亦不知何以得此于先生也後得先生手疏訪故人遺文行實而先人與焉予始疑先生之所以拳拳于予者或以先人故思欲一見以報其知而先生歿矣後五年至元丙子其子遇始與予會其雅相敬愛猶先生又二年遇謂予曰先人愛子者子為辭以哀先人莫子宜予固幸

其得以遂予哀故不辭先生諱時煦字春卿仙翁雍伯
之後嘗為興文署丞幼穎悟質厚制行不為崖岸惟喜
客家雖貧而延致接納无虛日隱居教授餘二十年名
公貴人往往出其門者築一室環種以竹名之曰庸齋
或為畱其象為野服蕭然先生顧而樂之名以庸齋自
適先生之病革也訣其門人李生曰予平生無媿於世
言竟怡然而逝其所學與其所行蓋可見矣而世獨以
好客稱之非知先生者遇今為史院編修官孫肯堂亦

好學其詞曰

嗟滴澆兮孰可淳賦敦龐兮公其人揚爾波兮一我存
矯獨立兮與物春物來納兮吾渾淪氣被物兮吾氤氲
彼巖巖兮駭絕倫嗟離物兮危爾身彼悠悠兮逐世紛
孰有渭兮不涇渾庸何常兮德有鄰微先生兮吾誰與
親

可菴韓道士真贊

不巢由不伊周陶然方外游不滄浪不廟堂超然無何

鄉冠其髮繩其鬚溫然山澤癯水其心雲其身飄然葛
天民俗而無塵野而有文九十康強人間幾人吾為可
庵之真乃神仙之神

王治中請趙君玉疏

道人游於內形骸無廢疾之嫌老者近於親飲食有患
養之戒惟其布帛之文不為野所以耆艾而信可以師
伏惟提學先生經明行修年高德劭人惜士安之苦節
天留鑿齒之半軀某早失師傅勤勞王事每慚將逼於

晚景但欲長聞於善言避堂寢以舍蓋公固不敢當禮
賢之僭載酒肴而過揚子或能伸問字之勤厨傳以修
薰沐而待

請趙提學疏

丁亥
正月

桑梓懷歸遂老者之志蓬茅增價賴賢者之光惠然肯
來實為全美伏惟提學先生詩文律口而成舉動聽天
之命置之中座居然宿儒某等久爾隣居歆乎雅望使
先生春秋浮湛鄉社亦何慚東道主人之招令我輩朝

夕出入里門庶能免西家愚夫之誚

請趙安之就師席疏

為州郡立師久著朝廷之令式選生徒入學屢頒臺憲之條章遂興激勵之心爰得依歸之所恭惟教授先生蚤親有道晚舉力田以公論所歸膺師儒之選某等幸居是郡得與諸生敬備束脩願行見先生之禮待新講肄望不虛鄉國之勤

靈陽觀鳩糧疏

奉為本院見闕道糧謹投一鄉上善共加補助者竊以
力田固請脩之本收功有豐歉之殊終歲徒勞連年失
望驩虞里巷共歌樂土之有秋寂寞齋厨實望仁人之
移粟

跋魯公祭李明姪文真蹟後

李明與盧逖同時遇害也今公所謂仁兄愛我俾爾傳
言者不應居逖之後也果先之則潛告之舉自忠節發
而史為遺誤矣且公於其父之廟碑自叙距師古為四

世與忠節為同祖而新史乃以公為師古五世從孫與忠節為同五世祖不應公自叙亦如撰歐陽確碑之有誤也舊史自以之推為公與忠節之五代祖以忠節為公之從父兄矣不知新史何所據而改之而汪應辰於公傳辨師古五世之誤於忠節傳不辨其同五世之誤亦可謂攷之不精矣是以知歐陽永叔不敢以新唐書世系列傳為正者不特張許孔氏而曾子固所謂史誤者又不特李白傳而已也至元丁丑八月癸亥日容城

劉某書

書饗餐圖後

饗餐之生于唐虞猶水物之生于陸也雖欲饗餐烏得而饗餐然其所以為饗餐則陽中之陰所不能紀雖欲不饗餐烏得而不饗餐以烏得而不饗餐者與烏得而饗餐者遇是以天下莫不見其為饗為餐而得以饗餐之也及世運降矣人道晦矣淳者漓而和者戾矣闕睢_麟趾之意息而河圖鳳鳥之嘆興饗餐兮餐兮此其時也

孰從而見其饗也孰從而見其饗也而又孰得而饗饗
之也此饗饗之所以列于器也夫饗饗之所以列于器
也其所以著夫惡則禹鼎以魑魅鑄楚史以檮杌名也
其所以示夫戒則尊彝之取象盤盂之有文也呂氏春
秋謂以象形飾者周制也或者曰以形象識之則殷器
也非周制也是則不可得而知也世且不可得而知又
烏得而知其用也金臺田景延得古饗饗拱泉而垂腹
羸其面而坐則人焉其下若有承盤者然河東元裕之

為之攷定其為古器之無疑也景延遂以劉敞呂大臨
例而圖之其友郝伯常欲為道其然而不果而屬予鳴
呼人之於古器物也強其所不可知而欲知之則為博
物之增惑也舍其所不可知而特慕其古焉則為玩物
之喪志也為增惑為喪志皆非知好古者也舍其所不
可知者而求其所可知者則古人之所以為戒者在我
矣因其所可慕者思其大可慕者則古人之所以為古
人者自此而得矣求知是知也求慕是慕也則斯器也

固有為致知之一明德之端者不惟在我之饗饗以此
而見在物之饗饗我將自此而得以饗饗也至元丁丑
正月丙寅容城劉某書

靜脩集卷二十四

欽定四庫全書

靜脩集卷二十五

七 拾遺

元 劉因 撰

先世雜事記

西瑩改葬後祭文

維至元五年十月戊寅朔承祀孫某謹以清酌之奠致
告于先塋前金塵昔蕩人其流離天寒我族逃難南飛
遼遼松楸誰主誰依雨齧烟荒牧踐狐悲春秋失祀神
其餒而降及大革吾宗益衰骨肉連喪不免兵飢我父

重生故里爰歸險阻艱難亦倍嘗之先澤未涸家運欲
伸稂莠是萌不肖惟因生遭閔凶早失二親先塋所在
莫知莫聞豺獺報本孰無此誠心泚溢顙中心靡寧寤
辟自聞云胡爾生親柩尚旅先塋未祔載訪鄉人得此

其處白溝之澳金容之曲實惟故域於焉是卜與此相
望不違十里神遊下泉尊卑有齒我惟後人莫探其紀
念我孤孫單獨一身形影相弔撫迹酸辛承我先業惟
恐有墜其敢勿勤遠大自期卓然千古樹我名勲堂堂

先靈死而不亡庶聞此言相我後人宗其有光神亦不
孤歲時匪懈拜掃敢忘

東塋改葬後祭文

祖

念我諸孫粗濡文墨實賴我祖好士雄偉神卧荒烟蓋
亦有年豈我父罪惟某之愆提攜教育不辱其先勿以

小怠忘其大全

先父遺命云汝祖父母在淺土我平生艱蹇不克葬汝能成之我事了矣

叔祖

我祖登第光我劉宗雖先世德亦我祖功天道何如俾
絕其嗣式值凶饑遽至於此我父惟子惟某則孫歲時
拜掃其敢勿鈞

禰

無狀招禍兒罪彌天天不遽殞俾值孤單亦愛吾字不
忍絕祀于其先苟立厥嗣實不願自延晨昏奉慰償過
于下泉嗚呼痛哉兒復何忍言

一二

三

四五

遠祖宗

高祖

敦武校尉臨洮府錄事判官

曾

奉議大夫中
山府錄事

祖

秉善父

述

六

因

高祖昉敦武校尉臨洮府錄事判官家居嘗夜坐廡下見一人盜厨中大釜識其為里巷子呼之語曰吾家口衆明日何以為具盜棄釜而走止之曰若走即使人執汝姑於此以待乃取錢襴釜之直與之且使置釜於竈

所竟不言及卒盜來哭且以其事告人曰吾不言則沒
翁之德嘗為吏部掾每為選人給紙札曰紙札亦細事
闕

鄉人號為劉佛子娶容城王氏男四

曾祖俟字德容奉議大夫中山府錄事為政有聲每罷
歸望容城其門映子下車凡長一歲者無貴賤皆納拜
娶邊氏有明鑒

並曾祖劉公子英業進士早世

祖秉善字文卿少讀書氣豪邁以義雄鄉里貞祐之變

鄉豪以國命推為萬人長遂逃避河南弟秉忠登科後
每教之曰科舉無用學特國家設此以取人耳有志于
學者豈可如是而已養孤姪如已出有外姻之無託者
皆為撫有不使失所其子自他而歸遇里中一嫗揖之
召而責曰彼年長雖賤亦人也乃延嫗上坐使再拜其
嚴類如此壬辰北渡六月六日卒於安平時年五十二
其子扶其柩葬於溝市里之西原娶陳氏生子男二曰
紫陽曰述女曰桂適金皇族完顏世襲千戶侯

祖考妣
六月九

日卒相去

無幾日

叔祖奉直府君行錄

君諱秉德改國寶字長卿小名壽郎小字延慶大定二十五年乙巳正月初一日生登興定二年進士第釋褐涇州涇陽縣主簿改藤州藤縣尹遷中書省令史未幾改司農主事尋授密院經歷終於奉直大夫鄭州防禦判官君性安靜恬退與物無競為學不喜作詞章貞祐間避地河南隱於豫州之許封山從學者惟孔文振茂

林脩竹清泉怪石終歲無人維琴書在側為省掾時其一省郎暴怒以燈擊其僕偶中君之首君瞑目端坐神色不動其人謝之曰偶爾何謝焉嘗燕居童僕鼓躁相詬詈以謂無人俄而風動簾起見君坐于堂中衆皆惶恐往謝罪君方瞑目端坐少間開目顧之曰若輩何在此耶衆乃具以罪狀自陳君徐曰曲直有在何至于鬪戒勿復然其寬裕類如此惜乎天不假年壬辰歿于京師之厄先娶王氏早世而高尚書有鄰欲以女妻之不

許曰吾不能以一女子而下貴人遂娶李氏生子男二人日乞住道道皆早卒

君諱述字繼先金泰和四年七月九日生六歲值貞祐之變從親南渡君早有大志穎悟絕人十六七棄舉子業廿六遭壬辰之革饑險備嘗北渡至安平二親連喪吾母病篤先生護柩扶疾重至鄉土田園盡非我有環堵蕭然宴如也遂刻意于學大難之後無書可讀求訪百至十年之間天文歷數陰陽醫方之書無不通性學

史學尤所喜者其書皆手所謄錄往來燕趙間交游皆父行之天下名士也時耶律中令君執政翰林承旨王公百一以名書薦之中令欲用而不就後至順天隱居教授杜門絕交萬事置之度外惟以教子為事曰始余四十未有子嘗語人果無子則已若有子必令讀書我今教子亦將以成吾之志而已性不喜酒好長嘯嘗游易州諸山當秋風落木之下危坐終日時作一曲其聲雖沖澹蕭散而其慨然之所不能忘者亦時見之然其

竹冠葛服雍容樂易人謂又有真隱之風焉先生平日明於藻鑑或評論人物或指明事體或推究世變人必待其驗而後服中統初左三部尚書劉公才卿宣撫真定道辟為武邑令未幾以病辭居真定之北潭至元四年九月還順天明年十月十二日病革命其子曰汝高祖以來未嘗為惡大兵之後吾再生而汝兄姊俱亡而汝獨在汝其勉之明日卒于客舍六年十月廿五日葬于容城縣溝市里之西原娶定興進士楊勗字勉之之幼女

楊氏生而有知年十六歸先生兵後親執爨無難色先生晚無子力請令別娶先生竟以天命拒之女曰綌曰繡皆適人而卒

先妣十一月
初六日卒

先君記事

泰和七年丁卯

七月九日
寅時生

崇慶元年壬申

從親
南渡

正大二年乙酉

娶楊
氏

壬辰

三月降闕
五月初五日從親北渡至安平六月初
日父母皆病歿十二月二十三日還容城

乙未

附籍

庚子

八月三日長女
阿乞生寅時

癸卯

遷定
興

乙巳

遷涑水 八月十
五日次女秀生

丙午

遷順
天

己酉

閏二月九日
亥時因生

庚戌

有北
京行

甲寅


長女嫁
韓氏

乙卯 遷涑水 十一月
初六日喪妻楊氏

丙辰 次女嫁
樂氏

己未 復還
順天

中統元年庚申 住真
定



靜脩集卷二十五